

CONCERTS

Concert Chor viril Surses e La Cumbricula a Savognin e Son Murezza

Cant da chor digl pi fegn

dad Ingelore Balzer

● La lavour da chor da dus ancunschaints dirigents ò carmalo ameis digl cant da tot las regiuns dalla Nagiadegna ainten la baselgia da Son Carla a Son Murezza. Igl Chor viril Surses ed igl ensemble Cumbricula on purschia cun lour producziuns en evenimaint auditiv nunamblidabel.

I smarvegla betg, tgi la baselgia acusticamaintg fitg adattada per tals tungs, era amplaneida anfignen tigl davos plaz. Ena tala concentraziun da delicatessas vocalas da nobla cultura da cant e monds sonors da dus chors an giubileum ò veiramaintg valeta da rarietad.

Igl ensemble La Cumbricula, fundo igl 1998 e mano da Jachen Janett, cun igls sies 15 chorists lascha mintg'onn crescher igl sies nivel. Er chella seira ò la pitschna gruppa fascino cun tung remarcabel homogen. Cun igls dus blocs da canzungs internaziunalas e viandond tras tschintg tschenteners ò igl ensemble laschea «arder giu» navot, an chegl tgi pertotga eleganza, flexibilitad ritmica, frestgezza e charme. E per fi musical e muments alleghers procure-scha igl dirigent adegna puspe gist sez. La sia fascinaziun tot originala per la musica surporta el sen igls chorists e transpona frestgezza e directadad, uscheia tg'ins tedla cun tensiun digl amprem anfignen tigl davos pled.

Igl antier «scarnuz da marveglias» da La Cumbricula ò persvadia antras la preschentaziun emoziunala digls tocs, antras ena pronunztga sainza macla, antras fegnas midadas dinamicas e da tempo scu er antras ena vasta palletta digl colorit musical e nianzas.

La «geniera» ed igl sies dirigent èn digl reminent vedlonder da registrar ena amprema CD. Ella duess neir preschentada alla publicitad agl rom dad en batesim igls 27 da settember 2008 agl Laudinella a Son Murezza.

Per igl accumpagnamaint extraordinari dallas canzungs ò procuro puspe eneda igl pianist Risch Biert. Adegna puspe fò el surstar



Schibagn igl Chor viril Surses scu er igl ensemble Cumbricula on persvadia cun ena ferma homogenitad.

cun las sias inspiraziuns ed excursiuns ainfra la harmonia e la ritmica. En striung dallas tastas tgi è capavel da carmelar monds tonals tgi fon surstar.

En grondious colorit

Mademamaintg en punct culminont dalla seira ò stada la preschentaziun digl Chor viril Surses cun las sias 55 grondiousas vouschs. Fundo igl 1907 ed è siva digl onn 2000 sot la direcziun da Luzius Hassler. El docent per didactica digl rom alla scol'ota a Coira. Siva las festividades da giubileum igl 2007 cun ovras novas da cumponist grischuns, ò igl chor mess la fegnameira da cantar ossa canzungs tipicas e tradiziunalas or digl retg stgazi da canzungs rumantschas.

Igl amprem bloc digl chor ò antschet cugl matg, plascheirs da premaveira, cun evenimentar l'amprema amour e la recreaziun ainten la nateira. Ainten la sia sagonda preschentaziun ò igl chor

cuntinuo cun igls bels, pero er igls muments pi grevs ainten la veta digl carstgang ed ò termino cun chella part da treis canzungs tgi vignan cantadas scu canzungs da paia igl zarcladour tar la festa da cant federala a Weinfelden.

Tge grondious maletg sonor, ruassevel ainten sasez, tgi chel chor è! Sch'ins sarava igl igls, parevigli da santeir en orgel gigant schi sonor. Davant chel è tschanto igl dirigent Luzius Hassler e totga igls pi bels registers.

Igl publicum è sa musso ferm commovia chella seira, betg angal digl magnific stgazi da canzungs rumantschas, mabagn spezial-maintg dallas interpretaziuns preschentadas digl chor. Ena sensibilitad remarcabla e scolada per igl tung ed igl sensori per igl colorit spezial da chesta musica on impressiuno mademamaintg scu la dinamica, igls bellezza acords finals e la intunaziun sainza macla. Pero cunzont l'expressiun incredibla da chesta cu-

minanza tgi canta da maniera schi homogena. Ins vess gugent tadlo ouras or!

Tschiel steilia communabel

Siva en supplemoint giavischia digl publicum è alloura anc sto igl grondious finale cun tots dus chors ansemen. La canzung «Sut steilas» da Gion Antoni Derungs tgi è resunada per la sagonda gEDA chella seira.

Ena finiziun gartageda dad en concert communabel e lotiers ins dastga gratular da cor agls dus chors, pero surtot agls dus dirigents.

Chel rapport digl concert è cumparia ainten la «Posta Ladina» digl 1. avregl 2008. L'autoura, Ingelore Balzer è anterioura scolasta da musica, oz an pensiun. Cun igl sies consentimaint e chel dalla tgesa editoura «Posta Ladina» vainsa dastgea surpiglier igl arte-tgel er per la Pagina da Surmeir. (transl. pb.)